

Script of Evening Gojri News Bulletin 6 November

2025 at 1700 Hrs

ایویننگ گو جری نیوز بلیٹن مورخہ 11 نومبر

2025

یوہ آکا شوانی جموں ہے محمد اشفاق عدیم تے عبدالرحمان شاہین
تیں خبر سُنو۔ پہلاں خاص خاص خبر۔

*1. وزیر اعظم نریندر مو دی پلک نویں دہلی مانہ قومی گیت "وندے ماترم" گا 150 سال پورا ہون ور اک جشن غو افتتاح کریں گا۔

*2. جموں کشمیر سرکار نے ثقافتی ورثہ نانہ باہدو دین خاطر "چیف منسٹر اسکیم" غو آغاز کیو ہے۔

*3. لیفٹنٹ گورنر منوج سنہا نے اج شری ماتا ویشنو دیوی غا پوتر مقام ور حاضری پیش کی ہے۔

*4. کپڑا وزارت نے قالین بُنکراں واسطے 100 مزید جدید مشیناں غی منظوری دتی ہے، یہ مشین قالین بنان آلاں نانہ بیسن بارے آرام دہ مقام وی فراہم کریں گی۔

*5. تے قبائلی امور غا وزیر جاوید احمد رانا نے متا سارا وفداں سنگ ملاقات کر غے مسائل نانہ بروقت حل کرن بارے یقین دہانی کروائی۔

خبراں غی تفصیل نال پہلاں محمد اشفاق عدیم۔

PM Vande Matram

وزیر اعظم نریندر مو دی پلک نویں دہلی مانہ قومی گیت وندے ماترم گا 150 سال پورا ہون ور اک یادگاری تقریب گو افتتاح کریں گا۔ اس تقریب غا آغاز تیں بعد اس غے تحت قریب اک سال توڑی بھارتی ثقافت تے اس غی آزادی غا سفر نانہ یا دکیو جائے گو۔ پلک تیں شروع ہون آلی یاہ تقریبی مہم آتے سال 7 نومبر توڑی برقرار رہ گی۔ وندے ماترم غا اس 150 سالہ جشن مانہ اک دستاویزی فلم وی پیش کی جائے گی۔

CM Heritage Course

جموں کشمیر حکومت نے محکمہ ہنر ترقیات غے تحت اک " چیف منسٹر سکیم نانہہ متعارف کرایو ہے، جس سنگ خطہ مانہہ ثقافتی ورثہ نانہہ محفوظ کیو جائے گو تے ہنر مندی نانہہ فروغ دتو جا سکے گو۔ مہاراکاشوانی غا نمائندہ نے دسیو ہے جے اس اسکیم غے تحت بکھ بکھ آئی آئی تیز تے پالیٹکنک اداراں مانہہ قریب 25 تربیتی مرکز قائم کیا جائیں گا، جن مانہہ ثقافتی ورثہ متعلق 7 کورس شروع کیا جائیں گا۔ واضع رہ جے اس اسکیم غے تحت ان مرکزوں اندر قریب 500 طلبہ غا داخلہ غی گنجائش وے گی۔ قابل ذکر ہے جے اس پہل سنگ نہ صرف ثقافتی ورثہ نانہہ فروغ دتو جائے گو بلکہ نوجوانان نانہہ متا سارا روزگار موقع وی فراہم کیا جائیں گا۔ واضع رہ جے تربیت حاصل کرن آلاں نانہہ ماہانہ غا طور ور وظیفو وی دتو جائے گو جد کہ تربیت کاراں نانہہ وی اعزاز دتا جائیں گا، جس سنگ تربیتی معیار نانہہ بابدو وے گو۔

CM Used Water Mgt

وزیر اعلیٰ عمر عبداللہ نے آج استعمال شدہ پانی بارے اک پروجیکٹ نانہہ مد نظر رکھتاں واں قریب 19 کروڑ 99 لکھ روپیہ منظور کیا جس مانہہ گا ندریل قصبہ مانہہ کہراں غا استعمال شدہ پانی نانہہ مناسب انتظامات سنگ یقینی بنایو جائے گو۔ اک سماجی میڈیا پوسٹ مانہہ وزیر اعلیٰ نے کہیو ہے اس پروجیکٹ غے تحت دریا واں نانہہ صاف رکھیو جائے گو جد کہ استعمال شدہ پانی نانہہ بہتر طریقہ سنگ نالاں غے ذریعے گذاریو جائے گو، جس سنگ صاف صفائی مانہہ بابدو وے گو تا جے کامل صحت بارے اقدامات نانہہ یقینی بنایو جا سکے۔

LG Vaishno Devi

لیفٹنٹ گورنر منوج سنہا نے آج ماتا ویشنو دیوی جی غی پوتر شرائین گفہ مانہہ حاضری دتی تے سب غی خیریت و خوشحالی واسطے دعا کی۔ انہاں نے جموں کشمیر مانہہ دیر پا امن، خوشحالی تے ہم آہنگی واسطے وی دعا کی۔ لیفٹنٹ گورنر منوج سنہا غو یوہ دورو اجتماعی پہلائی بہتری واسطے گہرہ روحانی عزم غی عکاسی کرے۔

JKEDI

جموں کشمیر کاروباری ترقیات ادارہ ٹی ہب حیدرہ آباد سنگ رل غے جموں کشمیر غا پلوامہ تے سانہہ ضلعان مانہہ اک کیمپ منعقد کرا رہی ہے۔ اس ضمن مانہہ درج شدہ امیدوار مین کیمپس پامپور مانہہ 7 توں 8 نومبر غے دوران شرکت کریں جد کہ 10 توں 11 نومبر نانہہ بڑی بڑھمنہ سانہہ مانہہ اس کیمپ غو حصو بنیں۔ یاد رہ جے اس کیمپ غو مقصد جموں کشمیر مانہہ سٹارٹ اپ غا معیار مانہہ بابدو دینو تے اس بارے نوجوانان نانہہ خود کفیل بنانو ہے۔

Ramban Horticulture

ضلع رام بن غو باغبانی محکمہ بکھ بکھ سکیمان غے تحت باغبانی غا شعبہ مانہہ ترقی نانہہ فروغ دے رہیو ہے۔ محکمہ مسائل غا حل تے خدمات نانہہ موثر طریقہ کار سنگ یقینی بنان خاطر مقامی انتظامیہ تے کسان برادری سنگ رل مل غے کم کر رہیو ہے۔ واضع

رہ جے محکمو میدانی علاقان واسطے 25 فیصد سبسڈی تے مخصوص علاقہ تے بکھ
 بکھ گروپ جسراہ ایس سی ، ایس ٹی، خواتین تے کسان تنظیمیں واسطے 33 فیصدی
 سبسڈی پیش کر رہیو ہے۔ قابل ذکر ہے جے لوہکا درجہ ور خوراک غی عمل آوری بارے
 پردہان منتری سکیم غے تحت 35 فیصدی قرضہ غی فراہمی غے نال 10 لکھ روپیاں
 غی سبسڈی وی فراہم کی جائے۔ آکاشوانی سنگ گل کرتاں واں علاقائی منڈی افسر رام
 بن تحصیل اقبال چب نے اس طرح کہیو۔ بانٹ۔

مزید خبراں نال عبدالرحمان شاہین ور اُس تیں پہلاں یوہ پیغام۔(یہ خبر تم آکاشوانی جموں
 تیں سن رہیا ہیں، تے یہ خبر مہاری ویب سائٹ نیوز آن آئیر ڈاٹ گوو ڈاٹ ان ور وی
 دستیاب ہیں، اس تیں یہ خبر مہاری موبائل ایپ تے ڈی ٹی ایچ ور وی دستیاب ہیں

Looms

کارپیٹ بُنکراں مانہہ 1 سو جدید سٹیل غی کتن آلی مشیناں غی تقسیم تیں پہلاں مرکزی
 کپڑہ وزارت نے اُون غا کم بارے اسکیم غے تحت مزید سو لومز یعنی کہ کتن آلی
 مشیناں غی خریدو تقسیم واسطے 51 لکھ روپیاں غی منظوری دے دی ہے۔ جہیڑو
 سلسلو مرکزی اُون ترقیاتی بورڈ غے تحت عمل مانہہ آوے گو۔ ہر لوم یعنی کہ کتن آلی
 مشین غی قیمت 51 ہزار روپیہ ہے تے انہاں کارپیٹ ٹیکنالوجی بارے بھارتیہ ادارہ
 یعنی آئی آئی سی ٹی سرینگر نے خصوصی طور ور تیار کیو ہے۔ جہیڑو بُنکراں
 واسطے مناسب پشت ٹیک تے آرام دہ نشست غو بندو بست فراہم کرے۔

Rana Delegations

قبائلی امور غا وزیر جاوید احمد رانا نے اج بکھ بکھ وفداں سنگ ملاقاتاں غو اک
 سلسلو منعقد کیو۔ وفد نے اپنی شکایات تے مسائل بارے آگاہ کرتاں واں ان غا ازالہ
 واسطے نمائندگیں پیش کیں۔ ملاقاتاں غے دوران وزیر موصوف نے عمر عبداللہ حکومت
 غا اِس عزم غو اعدا کیو جے عوامی شکایات غا بروقت حل تے جموں کشمیر پھر مانہہ
 ترقیاتی و فلاحی اقدامات مانہہ مضبوط بنان واسطے بھر پور کوشش جاری رہیں گی۔
 گجر بکروال پوسٹ گریجوٹ لڑکاں غا ہوسٹل غا اک وفد نے وزیر موصوف سنگ ملاقات
 کی تے اک تفصیلی مطالبات غو چارٹر پیش کیو۔ جس مانہہ ہنر غی ترقی ، مطالعاتی
 اداراں تے طلبائ واسطے ڈیجیٹل پڑھائی غا موقعان ور توجو دی گئی۔

Poonch Security Review

ضلع ترقیاتی کمشنر پونچھ اشوک کمار شرما نے ایس ایس پی پونچھ شفقت حسین بھٹ
 سنگ سب ڈویزن سرنگوٹ غو دورو کیو، تانجے علاقہ مانہہ حفاظتی انتظامات تے
 ترقیاتی کماں بارے جائزو لیو جاسکے۔ اِس دوران انہاں نے پرانی پروجیکٹ غو دورو
 کیو تے اُت کم کر رہیا مزدوراں غا رین سہن غا معاملات بارے وی جائزو لیو گیو۔ اس غے
 بعد ڈی سی موصوف نے درابا ، مچاکی تے مستان درہ مانہہ چل رہیا ترقیاتی کماں غو
 جائزو لیو تے اِس کم کاج مانہہ ویلے سر مکمل کرن بارے ہدایت جاری کیں۔

Fresh Snowfall

شمالی کشمیر غا مشہور سیاحتی مقام گلمرگ مانہہ تازہ برفباری سنگ سیلانیاں غی آمدورفت تے جوش مانہہ بابدو ہونو ہے۔ یاد رہے جے پہاڑاں غے بشکار یہ حسین وادی برف غی چادر سنگ ہور وی خوبصورت نظر آرہی ہیں۔ جہیڑی مُلک پھرتوں آن آلا سیلانیاں نانہہ اپنی طرف متوجہ کریں تے اس دوران سیلانی برفیلا میداناں مانہہ تصویر نگاری تے برف سنگ کھیڈتا نظر آرہیا ہیں۔ اس ضمن مانہہ مقامی لوکاں نے وی خوشی غو اظہار کیو ہے۔ مہارا آکاشوانی غا نمائندہ سنگ گل کرتاں واں سیر و سفاح خاطر آئی خاتون نے اس طرح کہیو۔۔ بانٹ۔۔

BSF Marathon

فرنٹیر ہیڈ کوارٹر سرحدی حفاظتی دستہ بی ایس ایف جموں بے منتظر آلا جموں بی ایس ایف میراتھون 2025 غی تیاریاں غا حصہ غا طور ور 2 روزہ میراتھون ایکسپو غو انعقاد کر رہیو ہے۔ یاہ نمائش 7 تے 8 نومبر 2025 نانہہ دوپہر 12 بجے تیں شام 5 بجے تک شہید ویر دیو سٹیڈیم بی ایس ایف پلوڑہ جموں مانہہ منعقد وے گی۔ اس ایکسپو غے دوران درج شدہ دوڑن آلا افراد اپنا پب نمبرز تے سرکاری ٹی شرٹس حاصل کرینگا، جد کہ سیلانیاں کھیڈاں غا سامان غو سٹال دیکھ سکیں گا تے براہ راست نغماتی بینڈ مظاہرہ یعنی کہ گان بجان تیں لطف اندوز وینگا۔ یاہ تقریب بی ایس ایف تے جموں غی عوام غا جذبہ تے توانائی غی عکاسی وے گی۔ جموں بی ایس ایف میراتھون 9 نومبر 2025 نانہہ منعقد کی جا نے گی۔

Hockey Jr World Cup

ایف آئی ایچ ہاکی مقابلان مانہہ مردان غا جو ننیر عالمی کپ 2025 غو ٹرافی ٹور اپنا دلچسپ قومی سفر غے سنگ پورا بھارت مانہہ شروع ہون جا رہیو ہے، تے 11 نومبر 2025 نانہہ جموں و کشمیر پُجن آلو ہے۔ یوہ قومی ٹرافی ٹور 7 نومبر نانہہ نویں دہلی تیں شروع وے گو تے 26 نومبر نانہہ تھیرو ننتھ پورم مانہہ اختتام پزیر وے گو، جس سنگ آن آلا عالمی مقابلان واسطے مُلک پھر مانہہ جوش و خروش پیدا ہو رہیو ہے۔ ایف آئی ایچ مردان غا ہاکی جو ننیر عالمی کپ غو 14 ووں شمارو 28 نومبر تیں 10 دسمبر 2025 تک منیر رادھا کرشنن ہاکی سٹیڈیم چننی تے مدورنی تامل ناڈو مانہہ منعقد وے گو۔ پہلی بار یوہ ٹورنامنٹ 24 ٹیمیں ور مشتمل وے گو۔ جہیڑیں اس باوقار خطاب واسطے مقابلو کرینگی۔

اس غے نال ہی خبراں غو یوہ بلیٹن ختم ہوؤ۔